

確山縣志

第一冊

第	第	第	第	第	第	目
七	六	五	四	三	二	一
卷	卷	卷	卷	卷	卷	錄
職	藩	戶	建	古	山	輿
官	封	口	置	蹟	川	地
表	表	考	考	考	考	考

中華民國二十一年十二月印

確山縣志

邑人申保三敬題

確山縣志

漢口大豐印書館代印

重修確山縣志序

志史類也雖非史而爲史之所自出秦漢以前無史與志之名而凡所謂三墳五典尙書春秋皆史之屬也八索九邱十五國風皆志之屬也殆各爲書而不相統自班書作而史中有志其記載風土者濫觴於魏晉而大盛於明清作史者莫不取材焉故郡縣之有志可以觀累代法度之沿革政教之遞嬗焉可以驗地輿之廣袤險易民戶之盛衰瘠沃焉可以考人材之興替與夫物產之豐絀風俗之良否焉爲牧令者羅致其地之賢士大夫搜採鄉土所見所聞類而輯之澤而文之編訂成書上之大府以達中樞薈萃纂組作爲國史而秉國者卽據以參考治亂之迹衡量古今之宜恢張經體之制內察俗習外酌時勢因革損益舍短用長以一邑之情通之一省以一省之情通之一國於是邑邑相屬各得其所而國乃可得而治蓋一志所

確山縣志

序

漢口大豐印書館代印

繫之重如此今天下苦於兵革典要之制作鴻業之潤色國家方有所不暇且文衰道敝卽區區徵考之事殆亦有不足言者然而闡發幽潛網羅散佚保古誼於絕續之交存憲章於凋殘之後俾其時政教禮俗人文物質雖一鄉一里莫不著之簡編信今傳後將使後之有志經世者披覽遺文根據故實有所資以爲融會中外調劑新舊之具是皆儒生之責而未可聽其及我身而湮滅而更望之百千年以後之人而有所待者也夫儒生而生於今之世既不獲發揮所學於政治有所表見第斤斤焉出其緒餘寓之於文其事已未然文者吾道所寄吾道行則所謂文者陳之爲典謨爲禹稷焉可也垂之爲官禮爲周公焉可也吾道不行則典謨官禮不必有其事而一於文厲焉是卽尼山刪詩書作春秋之志豈惟嘉惠一時後世將仰賴之烏得以其文焉而少之哉向者同薄遊梁垣嘗與蘭臬年丈先生

暨三五同志從事於重修河南省志之役顧以時局牽引蹙蹙未克卒業而去而先生適以其時兼膺確山縣志之聘類次綴輯朝夕覃思固所謂道不行而文厲焉者確山爲豫南名邑文獻可徵流風未沫舊志修于清乾隆年間閱時既久荒落已甚歲甲子某大令商之邑紳魏君警鐘暨張君伯昂諸同志倡議重修延先生主其事閱兩寒暑告成以更生得失法戒之詞抒江都正誼明道之旨吾知將來必爲修國史者所取材且以資後人經世之用可無疑也丁卯夏將以付梓先生馳書命爲之序誼不敢辭因爲述邑志之有當於用切於時及先生編纂本志之始末如右至於因文裁正隨事去取義有變通言資懲勸本志凡例所列詳矣奚容喋喋爲是爲序

重修確山縣志序

民國十六年夏歷丁卯冬月信陽陳善同敬序

確山縣志

序

二 漢口大豐印書館代印

志與史有以異乎曰無以異也典謨出而史之源開列國沿之各有史官以掌記時事春秋在東周亦國史之一實卽志也經孔子筆削之而褒貶之微權永照袞鉞厥後封建廢郡縣興凡記其事者遂不曰史而曰志唐李吉甫著元和郡縣志分門叙述遂爲後來志乘之先河顧志有三曰通志曰郡志曰邑志既有大小廣狹之分卽有繁簡詳略之異此一定之義也吾豫居中國之中汝南舊有天中之目得氣尤厚東漢以來名流輩出其士君子率多屏浮華崇節義千百年積習然也老友張蘭皋先生汝南碩儒頃袖所纂確山志畱余並囑綴以弁言辭不獲命因思確在東周爲江道兩國境漢魏爲朗陵至宋始易今名雖間有變置惟隸汝郡時最多前俯長淮後枕朗山金頂就形勝論適當豫鄂要衝而扼陳蔡右臂中原有事不但申息恃爲北門鎖鑰卽許鄭亦藉作南面之屏障初非尋常下邑比就人

物言肇於漢盛於明清雖稍遜然如劉亮工等之守正不阿張之堯等之樂善不倦皆卓卓可傳此外義俠勇烈因公殉難之士確有事實證明至達數百餘人之多英風浩氣焜耀千古尤爲他邑所罕聞豈非山川閒氣獨萃於天中故特生如許貞毅男兒用以植人綱而勵末俗歟按舊志成於乾隆初周大令之手彼時國方盛藉以藻飾承平嘉道以來江河日下延至光宣之際滄桑陡變文獻將湮蘭臯先生夙擅三長此次所定體裁大致仍以根據通志局頒行程式對於舊志則晦者顯之而別風淮雨之義以明誤者摘之而魯魚帝虎之僞以正遺者拾之而南陔華黍之辭可補疑者闕之而夏五郭公之例可援至於潮流所趨新政百出類皆前所未聞或聞而未睹罔弗蒐羅採摭綜核鉤稽法風人周爰之咨廣前哲集思之益固已燦然大備蔚爲成書卽或事勢所限周禮六官僅存其五獻子五友竟

確山縣志

序

三

漢口大豐印書館代印

忘其三但旣已起例發凡將來索驥按圖踵而成者更不至毫無依據在蘭臯懷抱奇瑋初不樂以一邑志見長然卽此一志之成一滴水可知江海味矣昔魏冰叔與王竹亭避兵雲陽雲陽密邇郡城時郡中大攻戰礮聲徹左右耳冰叔方序竹亭之文與竹亭上下古今意氣益激昂間暇其人其事二百年來傳爲佳話蘭臯之著述不知視竹亭何如余之謫陋視冰叔寧止霄壤夫亦何修得序蘭臯此書而附驥哉

中華民國十六年十月二十五日羅山畢太昌謹識於梁垣客次

重修確山縣志序

曩與汝南張蘭臯先生同膺河南重修通志局之聘得以日日討論志事而知志之關於政治者重也夫今之一縣大者數百里次者百餘里小者數十里儼然古諸侯之國也國必有史而後土地有所稽

人民有所寄典章文物有所徵所謂七十二國之寶書也自秦設郡縣而史氏之職廢漢書創爲十志地理僅列郡縣之名雖爲後世史家之所因而不能詳述地方之事勢使然也李吉甫撰元和志致意於建置沿革疆域道里田賦戶口關塞險要郡縣之制度既詳庶其風土之盛衰人民之苦樂得以達於朝廷而著於國史雖未知與古列國之史有合與否而宋元以來所傳之各郡縣志舉未能軼出其範圍也迨明及清更多從事於纂輯雍乾之際復以在上之權力督飭之由是全國之府廳州縣一千六百餘處其無志者不過邊徼初開之地約及十之二三耳其餘莫不有志又必十餘年或數十年而一續修蓋文化之推進無窮世事之變遷日異政令因時而改革人才繼起而彌多實有不得不然也所以定制各縣令於蒞任之初必取其縣之志而呈於各上臺各上臺之蒞任也亦然誠知其有關於

確山縣志

序

四

漢口大豐印書館代印

政治非詳閱之不足以考鏡得失也確山古爲江道二國境春秋之時雖不甚著而晉爲告王秦爲出次蓋已重視之矣漢晉梁唐人材輩出世所艷稱今且縮京漢南段之中區當豫鄂往來之衝要形勢之重迥非昔比而可任其湮墜哉舊志成於乾隆之初距今一百七八十年世變亟矣癸亥之歲蘭臯以其邑紳之敦請乃取而重修之正其誤而析其疑扶其微而補其闕義例雖有所變更而皆本於通志局所頒之程式固已由椎輪而進於大輅自草服而易爲袞衣矣吾知後之蒞確者必將資之以爲法戒而一切舉措興革之事無不奉爲依歸也而是時余亦有志於重修羅山縣志願以人事之拘牽與採訪之未備三四年間未得十之一二而蘭臯之書已於前歲告成戊辰仲夏忽齋以來殷殷商榷並囑爲序余受而卒讀之謹綴數言以旌蘭臯謙德之光且以志余因循之咎也

民國十七年七月九日羅山王榮楷識於汴垣厲次

重修確山縣志序

余家汝郡之西鄙距郡治暨確邑皆四十五里逾鎮西沙河一衣帶水卽毗確境故少時之所游釣親戚之所往來獨確地爲多其民情好尚風俗習慣山川蟠鬱物產豐饒無不得之於耳聞目見習焉而能道其詳及壯而與其邑之賢士大夫交遊又時於杯酒讌談間周諮博訪以稽古爲居今之助蓋於確邑之情形久已洞悉其概要矣惟是飢驅一命橐筆半生終年僕僕於京津秦鄂徐魯間而古朗陵近在咫尺僅數從城東車站躑躅徘徊咨嗟瞻望未獲一至城中寓目則於縣治街市之繁盛人煙之稠疊終茫然莫辨事有詳於大而忽於小明於遠而昧於近者人情大抵然也歲甲子僑寓梁園適有河南通志局纂修之役確山縣長林君少衡倩友人魏君警鐘張君

確山縣志

序

五

漢口大豐印書館代印

伯昂介紹携縣局各紳耆所編縣志稿聘余任總纂事辭不獲爰爲詳加探討次第研稽其見於疆域之沿革古蹟之流傳建置之方位戶口之盈虛以及山水之脈絡時政之組織罔不條分縷析爽若列眉惟茲編自周志增修後迄今又百有餘年中間人物烈女各傳調查有未盡詳明者經彼此竿牘往來竭力蒐集日積月累始獲裒然成帙蓋非諸同人編纂之勤無以致此則其成績爲不可沒也顧余所懷抱歉仄者如金石一門於志書頗關重要今獨略而不備經璜與同人再三磋商屢擬入山躬親跋涉藉以搜巖穴之幽奇訪經幢之殘缺以冀完成此書猥以時局倣擾兵匪縱橫慮蹈危險同人等皆勸勿輕往亦由地方連年貧困資斧無措致茲門暫付缺如至今思之殊增慚恧後有博雅君子倘能廣爲搜羅彌補罅漏匡我不逮是尤私心所厚望也夫

民國十七年夏歷戊辰七月二十六日汝南張縉璜自識於梁園憩

影軒

重修確山縣志序

邑之有志猶國之有史也志者記也記其事以備考也不矜史筆不侈文藻惟於一邑中之天文地輿山川建置田賦風俗人物藝文下及草木禽魚靡不分門別類搜羅剔抉據實直書不使稍有闕略良以舊縣志而爲郡志舊郡志而爲省志以供國史之採擇邑志顧不重哉確邑居中州之中南通鄂湘北達燕趙蟠龍鐘秀駐馬奧區山水鬱紆民風敦樸可記之事不一而足惟舊志值有明末造悉燼兵燹順治十七年知縣吳國杰檢斷碑殘碣創修邑志十卷後爲知縣張登第刪訂約草稿四卷上之當路迨康熙二十九年中丞閔梅公纂修中州省志將原稿發還知縣孫京授梨棗焉乾隆十年知縣周

確山縣志

序

六

漢口大豐印書館代印

之瑚因舊志日久重修仍爲四卷直至民國成立之後計一百七十餘年未經續修其間土田日益闢生齒日益繁物產日益饒人文日益起至於損益因革節烈懿行名官鄉賢在在足錄者彌多若不及時重修將文獻無徵何以彰往而信來典心焉憂之於民國六年商諸縣知事韋聯棣及邑之諸前輩有文名者數人任重修縣志事仿河南通志局頒定條例按區採訪務取翔實分類編輯姑爲草創只以地方不靖延擱時日至民國十一年分纂之稿本始成復同縣知事林肇煌及各採訪員各分纂員聘請張蘭臯先生爲總纂先生汝南名士也五車蘊腹二酉藏胸具才學識三長誠當此游刃而有餘歷三寒暑至民國十四年纂成稿本十二本分二十三卷繙閱一再覺是志也其提綱如條貫其分目若縷晰於舊志之遺者補之訛者正之疑者存之參以春秋之法出以董狐之筆郁郁乎與通志相表

襄與國史同源流真堪爲吾邑之全書足備輜軒之採也休哉典心
慰矣典續志之志竟成矣尤望後之君子覽是志者與典同志越數
十年一加修輯俾吾邑之志信而有徵永遠無替焉豈不懿歟是爲
序

民國十八年夏曆己巳孟秋月邑紳魏程典謹序於養靜書舍

舊序

古者建邦千八百國國有史史有官以司其事今之列郡所屬州有
州志縣有縣志非卽古史之遺意歟第考當時史官所記雖詳內而
略外然或朝聘或征伐或會盟往往他國並書而今之縣志惟于一
邑中之山川建置田賦人物等類加詳其於他邑則僅表其界連壤
接而事蹟則概不之及非略也蓋嘗縣志爲郡志嘗郡志爲省志嘗
省志而上供國史之採旣通天下爲一家則他邑之事自不必詳於

確山縣志

序

七 漢口大豐印書館代印

本邑而本邑之事搜羅剔抉有必不容或略而或闕者縣志之體裁
固當如是也洪惟我國家列聖相承聲教四訖卽荒陬遠徼莫不喁
喁向風豫省居天下之中風氣和淑爲腹心之地確山自漢唐以來
皆隸汝南郡南控荆襄東達徐揚西通宛洛雖蕞爾邑實八方輻輳
重地也舊有志書日久多殘顧百年以來仁漸義摩禮陶樂淑地則
猶是也而民風土俗迥非昔比纂而輯之用垂不朽非良有司將安
賴焉平江周君來宰斯邑愷悌而愛民質直而好義不炫奇而矜能
庶政克舉人用以和退食之餘日取舊志旁搜遠稽補遺正舛裒然
成集而問序於予予繙閱一再凡天文之分野山川之形勝賦稅之
額數風俗之醇樸與夫古今沿革以至人物藝文下及草木禽魚分
門別類燦若列星雖規模仍舊而考訂精詳可以供國史之採且舊
志以後損益因革節烈懿行將來不致湮沒而弗彰皆周君編輯力

也周君又慮舊板漶漫欲重付剞劂其因心之實政於斯更見一斑矣循良報最吾將拭目俟之惟望後之君子率周君之志越數十年一加修輯則書傳而人與俱傳雖非如古者有官以司其事而茲志之信而有徵者與古之史官豈異也哉是爲序

乾龍十一年歲次丙寅立春日河南承宣布政使司布政使通海趙城撰

舊序

邑之有誌也謂徒是誇史筆修文藻乎亦望宰斯土者洞悉一邑情形酌其宜以善其治且使邑之士君子景仰前徽共成風俗此誌之所由尚也考確邑居汝郡之中南通滇楚北達燕趙固所稱衝衢矣其俗質樸其民儉勤蓋猶有先代遺風焉惜也明季之世兵燹疊告文獻無徵自古跡以及名官鄉賢類皆十存一二湮沒不彰稽之舊

確山縣志

序

八

漢口大豐印書館代印

誌婁東吳君收其燼於順治十七年邗江孫君踵前任張君遺稿修於康熙三十一年而確邑之得稱有誌者此也繼自今又五十餘年矣我國家昇平日久聖天子累代相承休養教化蒸蒸日上山川猶是也而地土生齒日闢日繁物產民風日興日懋農畊鑿土絃歌雍雍熙熙景象何似誌之修也不當又在今日歟方伯趙公奉大中丞碩公德意飭修州縣志確令周君適因誌成請裁於余余惟誌以誌其實據其實而筆削之使一邑之所記與通誌相表裏與國史同源流則可以彰往卽足以詔後今是誌也闕者補之疑者存之附會者刪之古無今有者增之詳略得宜考據悉當誌如是亦可觀矣而邑宰之蒞斯土與士君子之產斯土者余亦因之有厚望矣是爲序

河南分巡南汝光道崔琳撰

舊序

周禮春官太史掌建邦之六典小史掌邦國之志典者治天下之大經大法也今則國史載之爲天下之史志者記也積記其事爲一方之史今之郡邑志是也合之爲國史分之爲郡邑志皆所以燦陳治體彰往而信來也確爲汝南支縣蟠山淮水互相融結形勢鬱紆風氣淳茂可記之事固不一而足第國初所輯舊志當明末兵燹之後文獻衰燼無所徵據因陋就簡等於草創嗣是以來聖清之化累治重熙數十年間土田日益闢戶口日益繁城郭人民如遊春臺文章制度炳焉與三代同風此不僅確邑爲然而在確言確亦非復曩昔之舊及今不加修纂使盛世之掌故缺然守土者曷道其責也予以乾隆六年春簡授茲郡竊有志於是久矣甲子九月奉方伯趙公檄飭府州縣重輯舊志爰移檄各屬卽以確志委之周令董其事閱歲餘而告成予思志猶史也史貴有三長才學識廢一不可尤當輔之

確山縣志

序

九

漢口大豐印書館代印

以信前史如南董諸人尙已他若班固受金而始書陳壽借米而方傳皆留玷汗青取訾來禩志中人物卽史家之列傳雖志無毀例然或眞贗混淆糠粃雜揉其何以傳信乎是書爲卷四爲條有九凡星野疆域沿革建置以迄田賦戶徭固皆窮源竟委瞭如列眉至人物一志務求公是不濫不遺其亦可以彰往而信來矣昔朱紫陽守南康下車卽詢舊志說者謂其識治體後之官於確者取是書而覽之稽輿圖察廢興周知民隱洞燭機宜將見摩畫多方無不如射之有志隨發而皆中確志之續修不大有裨於治體哉茲將付諸剞劂因述數言以弁其端

舊序

乾龍十年歲次乙丑嘉平既望汝寧府知府姚江孫必相撰並書

豫省當天下之中確山又當豫省之中萃天地菁華之氣而國家文

教洋溢光天薄海確尤近畿被化最速休明之象宜甲寰輿乃民風
太素有明三百年來士鮮達者有良有司弦歌博雅爲國宣猷澤士
宜民當必有道若惟是簿書錢穀糾錯紛拏承順上官風旨廣交游
密聲氣送往迎來僕僕勞勞則俗吏之爲文治益不遑振矣歲壬戌
予承乏茲土慮蹈斯尤刻心自砥觀學宮傾圮慨然者久之捐俸葺
理丹雘一新又念書院爲作人地以次倡建他如文昌魁星兩閣顏
范城隍諸祠榱桷垣墉同時聿煥并使塘汎驛遞名山古蹟有關確
志者靡弗釐然可觀至於孝子節婦優行淹學之儒尤核實表彰維
急蓋循良之績古今人或不相及而與民興行以期無負聖天子子
惠元元特調司牧至意自分內事也庸得諉邑諸生爭自濯磨以昌
文運歌鹿鳴而來者相繼晉謁予對之色然喜良亦知此與修建諸
事初不過會逢其適而兆之先見如泉始達如火始然將來經明行

確山縣志

序

十

漢口大豐印書館代印

修碩彥輩出正未有艾且士習端而民風亦卽從之不變是大有關
於名教也凡四載確不棄予予亦自幸不爲確棄人與地習識與習
長乃取舊志始自康熙癸酉缺者補之訛者正之邑黌士踴躍以勸
適上游飭修舊志檄亦下而予稿已就呈閱稱允遂用捐俸壽諸棗
梨因自維以蚊負山若弗克勝於人心風俗或無能補必且見遠於
大雅君子貽隕越羞斯志之成相質披文所損益實與確人士共之
確人士其謂我何也抑予思澤士膠庠文明化治道德一而風俗自
同是司牧興行諸人士亦與有責也諸人士誠文不先行而根於行
則文治日益光卽人心風俗之美舉覘諸此矣確人士其勉乎哉予
輿確人其共勉乎哉是爲序

乾龍十年乙丑桂月上澣之二日知確山縣事湖南岳州府平江縣
周之瑚禹彝氏題於朗陵署中

信牌

汝寧府信牌爲通飭事乾隆九年九月初一日蒙河南等處承宣布政使司布政使加十級紀錄十二次趙憲牌照得郡邑之有志猶國之有史史載一代星野疆域祥瑞災異以及君臣紀傳中外載記誌亦如之史卽誌之合誌卽史之分也豫省通誌於雍正年間延請名儒考訂纂修刊刻成集固足以信今而傳後但通誌爲一省之綱領其細微節末端賴邑乘考載詳明查各府州縣誌書大率於康熙初年纂訂之後類皆殘缺未經重輯此數十年來承平日久戶口繁多教化日興風俗移易土田則有墾闢之殊疆域則有改隸之異其人才叠見如掇高科而登黃榜者不乏人節孝可風而義行堪傳者不乏人至備佐茲土某某制行卓越某某素餐貽譏其姓氏尙在人耳目間及今博採輿論猶不失其真倘再因循日久不思增輯後之人

確山縣志

序

十一

漢口大豐印書館代印

卽欲採擇而編載之苦於文獻無徵則數十年之因革損益政績文章人物風土幾何不湮沒無聞謂非守土之咎歟夫今日之牧令額設公費無多欲其聘延碩彥多人開館纂修付之剗腕誠力有所未逮然就邑中紳士擇其品行端方素有文名者一二人與之商確考訂照依舊誌條款逐加增輯抄錄成書一申司府一付禮房收貯俾後之人稽考有據可以踵事而纂修之其事簡而易行其費約而不繁當亦諸君子所樂爲也合行通飭爲此仰府官吏照牌事理卽便轉飭所屬一體查照辦理仍將作何修輯緣由先行具報事竣將所輯之書抄錄送司查考毋視爲迂緩而致有高擱之舉毋畏其繁難而等於道旁之築是本司所深望也毋違速須至牌者

右牌仰確山縣准此

乾隆九年

月

日

舊序

志者誌也誌考也明末兵燹典籍悉燬祖龍縣志一書不存隻字今上御極十有七年混一輿圖四海耆定放牛歸馬偃武修文於是大中丞閻勅諸有司纂修全豫郡邑志以備記史所不及載煌煌乎熙朝盛事將傳百世而無軼乎稽自文獻莫徵一一於榛莽灰燼殘碑斷簡搜厥遺藏董是役者亦甚難哉猶幸賢良流澤薰炙人心勳名昭著尙得其什八而一善片長亦得附載於是始彬彬盛矣確山當天下之中南北風氣交會其地則桐柏之所趨長淮之所經蜿蜒起伏璀璨葱鬱甲於多方英靈毓發而爲人士遑遑競節負奇有范郭遺風民生不見淫邪無舟車走集之利布裕籠締蕁門茅屋山蔬野蕨佐克勤動其傳舊矣迨兵燹之後山川如故邑里蕭然極目荒蕪人煙渺絕欲求諸人物風俗視曩時能盡同耶否耶究消長之端審

確山縣志

序

十二

漢口大豐印書館代印

純駁之異而鼓舞變化廓大引伸以張厥盛則斯志之有功於名教也豈小補哉

順治庚子知確山縣事婁東圖吳國杰書

舊序

古天子制度文爲皆載之典冊而又博採民間風俗歌謠並藏柱下後世循此意而行之故正史之外又纂修一統志更勅郡縣無不各修志書所以記盛衰備採擇存實錄也志之由來不已久乎然其中則有難焉者蓋其地無山川之勝概人物之英華則不足以成書或山川秀矣人物盛矣而無史才以表章之亦不足以成書志豈易易也哉余自辛未歲叨膺簡命出宰是邑期以上副朝廷命官之意下答斯民仰望之心乃於諸務未遑卽取邑志閱之欲以悉其山川人物名宦士俗以爲敷政之資見夫忠孝節烈代有傳人士風典禮瞭

如指掌蓋彬彬乎稱盛矣但地名沿革多有舛錯人物之內有謬引他邑者有見于正史而經搜羅者每思於簿書之暇悉舉而訂正之存其真去其僞補其遺漏辯其舛訛以成一邑全書居無何而中丞大夫閻發下本邑志稿啟視之乃前任知縣張登第所呈續修草本也披讀一過見於地名沿革之舛錯者從而修正之謬引他邑人物者從而刪之正史所載而未登者從而補之不禁快然曰此先獲我心者也必如此始可成一邑之全書也余也訂正之思可以慰矣因於有關風化者略增一二事付之剞劂凡以成前任之功凡以酬夙昔之念凡以備輜軒之採凡以振土地人文之氣而使自茲以往邑之未興者日益興已興者日益盛後之視今非猶夫今之視昔是又余宰是邑之志而寄志于志也夫

刊江孫 京撰

舊序

昔夫子能言夏商之禮而嘆杞宋之不足徵其言曰文獻不足故也足則吾能徵之矣歷代城邑風謠朝野紀述盛衰陵替罔不悉記史臣蕭何入關收秦圖籍知天下阨塞戶口多寡由是觀之則校核事實彰往察來又曷可少哉我朝龍飛御極九有文獻彬彬獨吾豫兵火煨燼無徵無述豫省中丞閻檄勅纂輯邑侯吳公婁水星精南金重寶下車朗陵晉多士譚文章晝日三接閻檄敦碩彥於黌宮謀開館修纂諸生自以夜郎扶餘無敢應辟公搜厥遺藏諮諸耆舊聽政之暇馳驅筆墨篝燈午夜研糜吮毫嗟嗟確自隆古及今不一其代名流彥女不一其人沿革星野災祥變遷皆無隻字而公又吳豫遙隔不啻千里物非其產事非其習一一溯洄窮流瀉發於毫端而無旁滯非五車藏胸二酉蘊腹未能鉤索淵微也吾邑固嘗有志大概

鄙陋復亂與無志同兵一燹炬并不可問矣吳公厚我朗陵人士而亦以張我朝文獻之盛爲大備於明時爲足徵於後日則此志之成朗陵藉之益重也吳公多善政均田賦節民財息訟獄招流亡裁供闕之豆藜興市鎮之廛屋無澤中鴻雁之嗟有大厦雀燕之賀將見戶口日益田野日闢茂文獻而昭異代者其在今日乎因爲之序云

邑人汪宗楫書

凡例

一修志必先定其體裁然後綱舉目張可以有條不紊如習射之有正鵠大匠之有繩墨非是則體裁渾淆凌雜志書不可得而成也舊志都爲四卷大綱二十五條而細目則分爲二十四條稍嫌略而不備是編綱目一遵照通志局所頒重修縣志編纂大綱著筆其詳略則各視本縣之事實以爲斷原有者固遵述而不作之訓其採訪所得亦必擇其確實雅馴者乃爲登錄每篇作小序以提其綱領而節目亦以類從焉庶幾體裁劃一可無渾淆凌雜之弊

一此次縣志名曰重修與續修自不相同然舊志所載亦不得任情割棄茲編除前志所無不得不另行採訪編纂外其從前志書所紀足備後人攷證一概悉仍其舊以存本來面目

一舊志多載分野說多附會近今談天文家考諸晷度較爲精確至

確山縣志

凡例

十五

漢口大豐印書館代印

氣候以寒暑表推定之尤可自驗而知茲編卽據此意以爲定衡而從前星野聚訟之說可以刪

一疆域沿革名稱互異然欲於代遠年湮之際攷此疆彼界之分至難言矣舊志稱確爲古道國地而通志則以爲古江國地其說似屬兩歧然考道國故蹟在確山城北三十里古城而江國地則在正陽縣西南括地志則謂在息縣西南八十里兩地相距不過百里而近則兩國之在昔日似均屬確境以內無疑也茲編兼採其說以備參攷

一師心自用固著述家所必懲而襲謬沿訛亦考古者所宜戒舊志古蹟門如毛繩店本係毛城之誤而俗傳附會驚牛走出之說以爲因落毛繩於地得名二郎山据府志本以山有二郎廟而言而舊志誤作二浪遂以爲大水一浪起沒一山二浪起又沒一山然